

# Plumalhon

Junh de 2000

N° 43

Istòria  
**Los vikings**

MAINATGES  
D'ÒC



Conte  
**La pèça d'argent**

Reportatge  
**Lo potamochèr**

Reportatge  
**Cercaires d'aur**





# Lo potamochèr

Au miei de la  
seuva  
equatoriau  
que viu  
aqueth  
animau  
un pauc  
estranh, lo  
potamochèr.



Aquera bèstia ragòta, deu morre alongat, qu'ei de la familha deus facochèrs los sons cosins d'Africa. Los sons cosins d'Euròpa que son los pòrcs e los sanglars.



Lo potamochèr adulte que hè dinc a 75 cm de hautor e 1,40 m de longor. Los mei bèths que pesan 90 quilòs e que pòden viver 15 ans.

Segon lo lòc on demora, la soa color que pòt cambiar. Sovent qu'a lo peu ros dab ua listra blanca sus l'esquia. Qu'a lo gronh prim dab lo nas negre.

La particularitat deu noste potamochèr que son las aures. Que las a qui s'acaban per peus blancs e longs com pincèus. Que l'apèran tanben potamochèr d'aures-pincèus.

Que viu prumèr per las seuvas d'Africa de l'oèst. Que se n'i tròba tanben per las savanas e subertot peus parçans marescuts pr'amor que l'agrada de's brusar e de's boquilhar hens la hanga.



Lo potamochèr qu'ei omnivòre ; que minja frutas cadudas a tèrra, arradics e que li agradan hòrt los tubercules que tròba en hodiilhar dab lo mus. De còps que minja larvas d'insèctes, vertebrats petits e quitament sèrps.

Que viu en grop, escabòts de 5 a 15 bèstias miadas per un mascle gran. Qu'ei com los sanglars de noste.

Que s'amaneja de dias quan ei assobacat per la seuva e de nueits quan a besonh mei securitat.

Lo potamochèr qu'ei un mamifèr. La hémia que hè de 3 a 6 petits, los bitons, qui vaden au cap de quate mes de gestacion.

Aquera bèstia qu'ei caçada per las populacions locals pr'amor de la carn qui ei presada. De que n'i a començan de'n har lo neurissatge.

